

奚囊蠹餘卷之十五

墓志銘

江西南昌府通判野亭馬公墓志銘

余外舅野亭馬翁以嘉靖庚申十一月十九日
歿先是翁自爲志曰余讀陶淵明與諸子疏云
天地賦命生必有死自古聖賢誰能獨免逮卒
自爲挽歌祭文謂非齊死生而委順達化者乎
予生七十四年居林下二紀矣百齡易促歸盡
有期愧以謏行微名曷堪昭世然前無所稽後

將何述勉爲志之謹按世譜系出伯益春秋時
趙王子奢號馬服君子孫因以爲氏世家河南
郡屬扶風吾宗實宋太保默之後思陵南渡扈
蹕家杭繼遷海昌代有顯者宋萬十一宣教以
功能祀于鄉始祖搢元嘉興路總管同知高祖
昭杭州路總管府判從伯祖維周海道萬戶世
祖用周繼同知後抱道隱處海門號則天真居
士子昭昭生辰辰贅于陸籍芳林鄉實爲吾曾
祖以字行日子春生吾祖壽是生先考履齋公

廷玉蚤有文名格于時命應貢歷光澤教諭母
郭氏成化丁未四月十六日生宗俊于福州學
宮旣長傳家易學補郡學弟子員每督學使者
較文咸宜優等丙子舉于鄉庚辰下第以親老
乞就和門教諭戊子釋先人憂補弋陽尋陞直
隸來安知縣壬辰三載考績恭遇 皇上元祥
推恩贈吾父如子官母妻皆封孺人甲午進江
西南昌府通判時母年八十餘遂以終養不赴
配張氏政和主簿錢塘張浩菴女淡泊同志白

首伉儷子男長行健早世次行陸女二長歸福
建布政司右叅政張某封安人次鴻臚寺司賓
署署丞沈董孫男亦龍縣學生本鳳岡族姪文
奎季子爲吾兒行健後孫女歸滑縣教諭程近
齋子淞業儒生平質任自持不逐時好簡言寡
交人罕知之始爲親祿仕終辭祿養親良順風
心家居讀書厭入城府角巾野服人稱野亭先
生時有素心人萬鹿園李岫嘯相與往來庶幾
二仲或招之遊亦問往不爲絕俗雖兩羅回祿

室廬蕩然無所動於中也此先生自叙云爾先
生抱道守正澹泊無營宦游十餘年所至不私
一錢在祁門以明理脩身率諸生揭紫陽白鹿
洞規衍以經傳俾知嚮往爲今日專務德化不
事法術盡革浮費尤謹貯積適歲大侵恃有備
得無流亡撫臺某行縣入滁過責俱張至厲聲
色先生曰吏本儒素不習奢靡請伏不敏之罪
某慙而去自是心厭折腰歸思不可遏矣會有
南昌之命弃官來還圖書數卷泰然自足郡

大夫捧檄詣先生先生辭謝使者三終不肯受
獨靜處一室陳書攜藻卽朝夕不自謀其於世
俗交際炎涼毀譽寧有介於胸臆哉先生每自
比淵明其嘗爲文壽先生亦謂神乎於靖節今
以耳目覩記奚古今人不相及哉所著正學良
規衍義內典要言各一卷經濟記要一百八卷
野同集二卷鈎玄集四卷藏家所不存者倍是
次年正月十二日葬棲霞山新阡與張孺人合
孺人別有志不述述翁自叙與其生平大節如

右系之銘曰繫宗伯益輔徙吳越兮儒林世家
簪纓奕葉兮疇則天直沉潛道脉兮疇罹播遷
芳林穎脫兮光澤有教從政猶缺兮政教式蕪
云胡宦拙兮世情固多違兮過自任高潔兮一
錢不饑五斗不屑兮手著楊玄身僵袁雪兮心
機息物我兮性靈徹生滅兮遠比黔婁近方靖
節兮悠悠林壑信美以樂兮餘富餘貴不愧不
怍兮

朱近城墓志銘

吾杭故宋舊都當思陵南渡時扈從多中原人
故今著姓往往系出中原有以也錢塘近城朱
公其先亦由彰德安陽徙河南偃師已而入浙
五世祖德貴元至正間始籍仁和我 明洪武
初高祖元亮改錢塘亮生賢累贈中憲大夫直
隸廬州知府賢生鏞登景泰辛未進士歷官廣
西右叅政鏞生淇淇娶廣南知府沈好禮女是
生近城公公諱桓字司直居故傍城隅因以自
號自幼穎異習父祖遺書通胡氏春秋值家中

衰乃弃去服賈勤約謹守不墜先業願自以不
終夙志悉心教子嘗以已意微激之子竟以其
父書顯發身賢科爲州刺史先業益振公於是
盡解世累日與里中二三老人徜徉湖山間縱
飲自適刺史君又順承其意凡事不以溷公
唯恣所欲用爲取給公廼時時得劇飲爲樂間
就屠浮談空寂施舍不恡生平戇直寡耦侷儻
不羈與人游雖猥賤亦得近就亢禮卽貴盛輒
遠避若將貌之刺史君嘗爲公輸貲司農授散

官公辭以野朴不稱取冠服深緘篋中示不再
着曰使我正冠束帶局趣作勞孰與持杯笑傲
陶然無營哉卒之日猶引滿如常忽就寢瞑目
長逝是爲嘉靖辛酉正月十八日生成化辛丑
九月二十三日享年八十有一余聞往哲矯世
厭俗失意自放多寄興於酒或遺形見性輪迴
生死輒托跡於佛世稱陶隱君白居易豈不羸
垂豪貴泡影人寰哉近城公宜有心嚮慕其人
視世銖兩貨財愁居懾處孳孳無已者不可同

日語也公配陳氏石埭司訓東滄公女先公二
十一年卒子一孫炎卽所稱刺史君嘗知江西
寧州有治行女一適龍南簿沈思孫男一建北
充邑庠生文學世其家女三長適禮部儒士來
棟次許龍溪丞王君子有道一幼曾孫男二金
鼎金殿女亦一是年 月 日厝公大慈山之
原刺史君以余曩舉於鄉附君驥尾金鼎又聘
余女孫分誼良厚當爲公作銘銘曰物不在羸
所貴能享陶然樂生適請心賞冠服匪榮招提

延想既壽且康令終高朗悠悠素風永遺企仰
陸靜泉墓志銘

余友高光州應冕爲其舅氏靜泉公作狀曰公
姓陸氏諱深字淵之本陸績之裔十世祖金自
汴徙浙遂爲仁和鉅姓世多聞人澤州刺史某
清河縣令某陝西右叅政溥其通顯較著者也
曾大父安大父俊父欽母陳氏生三男子公行
二少竒穎善記誦尤喜諸家方伎雜言稍長奪
於治生又多疾受方外吐納之術瘳瘳顧益壯

獲終業舉子然自是善應對無市井俚俗
之言進退容止非禮不行與人交溫溫無忤至
商確古今裁度利害往往出人意外家世貨殖
公臨財充廉不詭譎取贏家稍裕輒知止足益
簡約無盛麗態年六十召諸子曰余承先業幸
以節儉力行不墜茲老矣寧能復爲兒曹作勞
其拆爾居均爾資各事以給我餘年自是謝
世紛專意方外傳攝生蓋謹是歲滿八旬忽減
眠食諸子憂之公咲曰死生命也命盡歸化往

余謹自攝正以俟命爾徧與所親未訣沐浴更衣而逝始公出贅於陳陳又爲徐贅壻皆絕嗣公不忘二姓廟祀于家歲率三拜墓所六十餘年不衰鄉鄰緩急相投卽昏夜不以他故爲解遇橫逆輒免首下之里人以是多公縣令文階舉 國家優老之典躬致冠帶以示榮異公謹謝之卒布素終身誠非其好也生成化己亥六月四日卒嘉靖戊午七月三十日子三楷檉楫女醜指揮僉事沈希渭郡守空泉公子孫男六

科稷穰種穩穆女八長通張楫次庠生朱建北次王長春次許凌登名次周濂次崔羽蛟皆名家子餘幼曾孫男一乘龍女三楷等以 年

月 日葬公法空埠新阡公躬自上築云余竊謂光州論篤君子所稱宜不誣不驕不奢守玄去智以完天年所謂脩道養壽非邪道家之用主於無爲故能清靜自正壽考無疆聞公勤慎不息應接周詳終不以衰暮缺望於人豈其方外之傳非夫老氏之旨庶幾哉知雄守雌深

藏若虛者與易筭數語知命達天異於徇物憑
生者已是用作銘銘曰利以義將死與生忘其
心布素不辱冠裳天錫遐祉既裕且康手築斯
丘樂哉末藏

顧玩川墓志銘

余往歲與今博興令介亭顧君同爲諸生從博
學交易相友善迺翁玩川公又嘗與余先大夫
知顧氏今年玩川公以壽終介亭君還自
惠州其所爲狀乞銘葬公誼不得辭按

狀公諱瀾字道卿自號玩川上世出洛陽扈宋
蹕南來家焉其後遂爲仁和人五世祖節明經
起家仕元爲翰林編脩有文名節生傑傑生臣
臣生義義生鑑鑑配金氏生公性固質直亦醞
藉暢朗杭俗奢靡奢故易傾公獨不務奢靡歲
時伏臘男女婚姻並視禮制豐嗇先世有遺貲
田廬兢兢守之居常稍自給卽不過爲經營優
游徜徉澹如也喜談世故豐豐劇說間作詼諧
使人傾耳解頤卒歸雅正與人交款款各盡其

意或杯酒殷勤雅歌投壺視塵世事若無介於
芻臆迺所與亦人人樂就卽處踈忘其分處少
忘其年尤喜揚人之美能匿人之過故里閭識
不識咸樂公長厚稱爲善士終身無怨惡於人
公有同母弟二皆蚤歿公痛悼無已厚贖其孤
生男子亦二量才授業伯宜賈令廢舉與時轉
貨贊仲宜儒令業舉子竟能用其長各有成立
介亭君旣舉於鄉仕爲博興令政先愷悌嘉善
矜不能於民亦鮮怨惡蓋公之隱施云晚以例

授七品冠服以非志不絢侈於交親生成化戊
戌五月三日歿嘉靖丁巳五月六日享年八十
配姚氏初有男子四人相楷皆先卒今存者二
曰材曰楫楫卽介亭君女四景州知州施繼祖
省祭官馮鵬姚鎧沈槐其壻也孫男六曰方立
交京克豪交京皆學官弟子女七徐立德陳素
望蔣仁王體益陳其豆皆孫壻一幼曾孫男一
曰汝霖女三
是年 月 日葬錢塘東山街祖
塋之次惠州君云我太史公家聲寔振起於玩

川爲義方克成令子於是子姓嚮風爭務儒業
始彬彬稱盛因思公優游無營豈所謂急先務
哉已通達世故故混跡閭閻若和同然所含畜
輝光以貽後嗣意念深矣惠州君公姪孫言舉
進士荐歷郡守所稱不誣云銘曰無謂優游克
振爾後亦若和同培積彌厚頤人之寬康以壽
子孫繩繩繁且秀鬱鬱故阡悠以久我銘貞石
同不朽

滑縣儒學教諭程君墓志銘

近齋程君者滑縣學諭也余嘗守大名滑爲屬
邑君數謁郡治貌既古朴著敝衣冠曳履緩步
無足恭論事侃侃與商確古今必出已見卽有
異同終不阿私所好余諒君質直署上考至事
他上官無異狀時撫按監司多名公謂余非私
亦署上考會三載黜陟余轉官西去不及行攝
守事者卒以無禮惡之當路罷君官滑人士立
石紀思王侍御璜重許可所爲文無謏詞蓋深
惜云歸無何忽忽抱疾歿君自信誠過豈出處

未達於命邪彼生死亦命也君絕筆云乘風歸
去來青天與白日則已洒然達化豈其不達於
命邪君諱鑿字應物一字于民近齋其自號也
先世由汴南渡世家仁和謝家塘數傳至彥亮
轉徙城東忠清里彥亮生歷歷生震震奉例輸
資授七品散官配柯氏以弘治庚戌六月三日
生君自幼穎異解音律技藝十二喪父家漸落
攻金養母輒先諸金工值數倍弃去爲商往來
儲賤鬻貴與時低昂日就血裕會當係辦爲也

史廷辱耻之嘆曰用貧求官與農不如工工不如
商迺遠耻不如儒也翻然業舉子時年已及壯
人以爲難君發憤誦習手一經作息不釋不踰
年西蜀劉公五清董學政閱君卷竒之選充學
宮弟子再試高等收廩餼文名藉甚自以取青
紫等拾芥數射策至七不中迺循次應歲貢上
春官謁選得獻縣訓導獻令每缺巡院輒檄君
署縣事君首表翟烈婦之寃建河間獻王碑築
尚林堤吊死問疾士民感服事聞上官數與優

勞五年遷滑縣教諭至則脩講堂立饌會建巖
岩亭日與生徒遊息其中又榜節壽堂嘉將孝
子新白雲屋表揚先賢脩畫舫齋編滑臺志士
民感服如獻事聞上官又數與優勞督學使者
雅知君能文令得與弟子員射策京闈又數
中以君才藝取科第直等拾芥然竟不一遇
也夫君生平不習容止無城府信而有謀
辯能解息紛爭人人樂與游事母孝處
童僕有恩教人先德行敏而好學垂老

彌篤所著有胥談八卷遺品錄四

四卷藏于家歿嘉靖丙辰二月五日

有七配李氏生子男淞仍業舉子也

邑唐夔次餘杭將燿孫男三作梅

憶往歲經獻君伺余傳舍曰安

舒意氣已而果然逮聲稱既起

為望轉遷益舒

展意氣不知嚙者已陰乘其釁向令卑泚而前
熾趨而言屈已苟容遇正士不好奇禮亦且心
非面豈言之同見斥耳孰與委蛇順適信其辨智

以直節終身哉宜無憾已
年 月 日葬
君 山之陽銘曰振蠱耻貧明經耻賤客與
儒林其塞不變斯事在勉強沒齒無倦者也彼
科第終遺功名不遠植節守義逢彼險陷則命
途之困也又何怨哉又何怨哉

勅封孺人張氏墓志銘

余於張孺人之亡重嘆夫阨窮憂鬱之難
道固不可測云孺人錢塘人政和縣簿
南昌府通判野亭馬翁之配翁諱宗俊

仁和人父光澤教諭諱廷玉始二姓聯姻以同
宦閩中翁與孺人生不家食已而翁游郡庠孺
人來歸無幾何翁以明經登高科就教初門擢
來安令孺人每相從官中怡然適也迨遷南昌
翁母老子喪從此弃去盖四十餘年始就里閨
所值固已不憊然猶守故田廬謂能窮約終老
已而家人不戒故廬燬則舍田結廬甫成海寇
至萬戶煨燼所結廬又不免於是孑然無朝夕
計翁猶善自遣迺孺人女也性本嗇既不堪目

前又追惟往昔坐而嘆仰而思潸然以泣問之
顧大嘯異常傷心甚矣數月而病病數月卒悲
夫使孺人終身寧謚之地安享有家之樂豈遽
至是翁誠達士至是欲無少介於中難矣悲夫
悲夫歿之次年、月、日卜葬棲霞嶺之新阡
翁命之銘意內行不外見惟兒女輩能悉也志
曰孺人諱某父政和公治行節廉別於流俗母
方氏以弘治癸丑二月十六日生其稱孺人以
翁為縣令任滿奏最得封生平寡言語摠內聲

不外聞無故足不及捫外卽出見內親唯諾之
外無他語亦鮮笑容深居唯女紅是事刺繡精
巧人人自以不及翁其布素孺人亦布素數浣
數補綴晨昏針線不離指馬固著姓在仁和無
繁支翁同行四五人歿皆無後翁又中歲喪子
一姓累傳將斬然絕祀可為寒心孺人迺亟為
置妾不孕輒易之又擇海昌遠宗子立為子後
授以遺書今已為儒生克承世業所易妾果孕
子人謂翁德厚宜然寔孺人容畜養翼所成云

撫群下嚴而有恩歿之日無少長咸歔歔流涕
誠有所以感之是爲嘉靖戊午正月二十有一
歷春秋六十有六所生子女二長歸某以嘗在
郎署受封安人次適沈董鴻臚寺司賓署丞男
曰行健庶男曰行陸律早夭遺孫女一適儒生
程淞所立嗣孫曰亦龍曾孫曰紹源其竊悲孺
人於馬氏繼絕之功良偉不食其報而重以憂
鬱亡也蒼蒼豈有意乎銘曰人亦有言入門見
如豈不而如嗟嗟衰祚旣孕而孽亦繼而絕如
綫如砥以延世業已貴不驕耳與素守庶吏之
子庶吏之偶胡畀窮茲蒼蒼不謬棲霞迥秀振
振爾後

鄭母吳氏墓志銘

歲丁未二月七日鄭母吳氏卒先是鄭母疾篤
其子布請禱曰吾自幼迄今備歷艱辛寒燠初
不謂禱祠神佛可免疾苦矧脩短有命吾老且
耄寧復求不死邪乃勸之進藥曰吾亦素不習
藥餌竟不嘗已而出其自製斂具次第言治喪

之儀一如禮蓋迨死不亂云嗚呼世人諂瀆鬼神徼福澤採煉服食希長生賢知者所不能免死者人之大閑也若鄭母者雖達人何以加諸吳本吾杭士族父某從父璿舉進士爲州刺史起家母楊氏寔生鄭母年二十八歸于鄭鄭處士子孟紳先娶於王天無出以吳繼焉處士出自南京太常少卿環始太常歿於官囊無遺貲而家被燬時處土方貨殖江湖間災且亟鄭母地其先世木主以避不恤其他里人以是莫不

賢知鄭母既而相處士克勤內政擁全旣蠱之緒乃堂乃構繩繩而粟粟焉誨二子習舉子常曰爾儒家子也母令先業自爾輩斬遇夜讀爲事女工相其怠宵分不輟於是二子苦心勵行咸補學官弟子卓有文譽處士家世禮誼凡事先睦族及昏喪宴會諸事事大略遵倣古制不競世俗鄙瑣鄭母實周旋其中俾疏戚豐約一當於法處士既歿其長子又歿凡歷憂苦怵劇終鄭母之身其先世遺風不衰余於鄭同里習

明鄉人言如此子布復謂余曰母素稟剛方不苟
笑語遇下嚴而不厲稔不理於紛華不惑於
施捨無遽喜積怒故終身無隱疾則其平生殆
有君子之行宜臨絕不可亂也詎生天順甲申
十月二十三日享年八十有四處士以嘉靖辛
卯卒先母十有六年其行在司馬郎吳君所爲
志中子男二曰存曰布存亦先卒孫男四曰蒙
亨謙亨存出復亨震亨孫女二長許傳其次幼
俱布出布等將以是年 月 日合葬于處士
墓墓在石壁山原祖塋之次銘曰終始天其運
乎修短命其殊乎曷斷其真而任其愚疇女質
而行儒達哉令終素心靡渝石壁高原君子是
俱於其永安以娛

廣東雷州府知府箕泉王公墓誌銘

雷郡太守箕泉王公諱子卿字元案上世籍錢
塘後更仁和今爲仁和人由邑博士弟子員以
通毛詩舉于鄉卒業成均授靈壁令擢南京大
理評事進右寺正值母喪還起補大理左寺正

尋出知雷州居歲餘勞瘁疾劇解官歸歸四月
卒夙賦清令爲文雋永精思暑年卽名聲籍甚
與余爲金石交當是時余弟中丞濂許方伯應
元童憲使漢臣方郡守九叙高光州應冕朱寧
州孫炎咸號才子竒特振奮浮英華湛道德同
爲諸生相友善已皆仕有祿秩公凡五上春官
嗚然曰丈夫表見當世豈必盡出甲科哉遂試
吏靈壁境故多豪右宿猾爲鈎稽剔刷義厲而
仁柔之令行化洽卽專意拊綏又被飾文墨隣

境寇猝至邑素無兵人情洶洶公募士馳騎往
來蹂躪城下飛塵蔽野賊望見疑備嚴引去回
襲擊賊賊潰事聞拜 帑金之賜部使者廉其
實數上章列公治行卓異宜召拜清華於是有
廷評之擢舊都事簡公暇偕同志尋幽吊古篇
什日富在雷首却供億之費期以節儉導民黠
寇羅漢卿吳平剽掠海上公旣繕城郭嚴保甲
捕得賊嚮導寘之法民以無恐乃間招吳使圖
羅自贖羅果成擒寘陰剪吳翼將併薙刈無難

也功未就而寢疾彼其意志所注概可想見郡
民今為建祠奉嘗非夫保民捍患之功有當於
人心哉公天性孝友事父槐庄公至割股療疾
供奉後母不異所自出每推羸周急甚者依之
居食歲久不厭尤善交人嘉善矜不能所與遊
遠近厚薄莫不意滿摘詞染翰秀麗可傳所著
林陵稿鼓檝浪言山中集旅寄冗談棘臺雜味
粹行在篋者尚不止是公生正德庚午六月
日歿隆慶丁卯三月十八日春秋五十有

八槐庄公諱浩贈文林郎大理寺評事母羅氏
繼蔣氏贈封皆太孺人並以公貴祖輔曾祖惠
高祖橋皆隱德弗耀豁達慷慨振家聲啓儒術
實自槐庄始云配沈氏封孺人生子男三長紹
科太學生蚤夭次紹名邑學生次紹賢女二長
適鄭斯麟次張杞皆邑學生孫男二錫胤錫祚
孺人先公十年卒繼亦沈氏將以 年 月
日葬赤山埠之新阡憲副臯亭姚公以公仲子
為子壻狀行甚詳余憶附公驥尾繙交三十餘

年無纖介抵牾往歲待次銓曹公方下第就選人有招公謁政府當得美除予聞亟勸止之公毅然曰何往非自效地敢徇時局妄希冀乎竟得令邑後余後西鄙橫被口語公時在棘寺孜孜爲余述平生辨詆挫不啻身鱗而自解也嗟乎世情言逆耳不相入懷忌嫉相機陷往往而是公篤信不惑白首不渝所謂金石之交非耶昔蘇文忠哭文與可謂不疾不徐不可得而親疎文雅緼藉公奚忝於斯言媿無文忠之詞表

公貞珉然奚忍以蕪拙解也爲之銘曰溫溫儒宗力不勝折衝何南金之純而利于將之鋒綴文馮馮耻行不逮躬何屬詞之麗而執德之弘開芳懋實敬事庸功怙恃情深金蘭永終河陽頌岳渤海思龔輞川風雅逸少精工婉美兼資垂世何窮豈直一節之士一藝之雄已耶

參將明溪周君暨配謝氏合塋墓誌銘

余蚤歲與兄風山光祿弟子清中丞同受經鄉塾一時皆英特士而參將明溪在焉已各駸駸

貴顯明溪獨偃蹇不偶 世廟庚戌後四方稱
兵加意武備往往起閭閻韋布之雄立致將帥
於是明溪走都下當是時同宗容齋京已仕爲
錦衣都指揮使因隸籍登武科尋以騎射韜畧
舉會試第一名動京師例授錦衣副千戶未幾
進指揮僉事守備贑州以功能再進都指揮僉
書吾浙專閩東省拜鹽城叅將再奉 璽書移
守嶺西高肇等處不數載累官三品不啻貴顯
崇盛矣豈非遇時而命也哉何前齋後豐也迨

余督兩廣諸軍明溪爲裨帥一見輒稱病余察
知病狀方圖請易會有被逮之報覈之頗不得
實心跡既白而明溪卒抱憂憤以歿悲夫功而
得過信迺見疑古今聖賢豪傑所不免獨一明
溪哉明溪姓周氏名濬字嶸伯世仁和人曾祖
全祖信父傑母毛氏正德乙丑七月三日生賦
質清粹通朱氏周易義善詩文作真草書遒勁
有法性孝友事兄平溪巒終始無間爲將多機
警馭下恩威並用孚心士卒故屢有平定功在

賴日威行諸山寇不入境浙中酌議屯政切中
時宜鹽城弭盜防倭保障允賴嶺西平尖嘴等
巢搗黠酋全仕侈等寨著績殊偉紀功者聞于
朝兩有白金文綺之 賜督撫巡臺庶其才咸
薦獎之若御史大夫南岷王公司空鎮山朱公
司馬自湖吳公推引尤亟陽春之後余猶勉以
力疾終事而疾劇竟不可強不知者方以避難
引疾疑之彼敘功受賞彰明較著如此顧云罪
浮於功曾不知中於嘆者之口欲以服將士之

心作遠臣之氣豈不難哉元配謝氏詩人可山
惠之女婉慧貞靜主中饋旁及書筭技藝靡不
通解始可山本奇其女一見明溪輒又奇之竟
以女托焉處窮約以勤儉濟其無遇拂抑以命
數寬其憂當遠遊以振奮鼓其氣迨利達以患
害惕其衷至於謹祀事端闔儀相夫子匡不逮
馭臧獲均慈惠教胤子用義方凡此可謂克全
婦道矣嘉靖丙寅十一月十四日卒於家距生
正德庚午春秋五十有七隆慶己巳十一月十

八日明溪卒南雄道中春秋六十有五嗚呼明溪挾儒術以待聘卒不售而以武功顯誠命矣其不遂首丘之願與淑人敦篤懿範而皆不享壽祺孰非命運天定豈必憂怨能傷人哉子男沂隨征有功劄授冠帶武生女適順昌唐令子佐孫男某女二沂聞訃奔粵奉旅襯來還併舉淑人樞合窆焉因風山兄來乞銘且跪而泣曰遵遺命也余不忍辭爲之銘曰因維心亨豈不偶不知其人視其友錦組輝煌絢當書蕩滌氣

稜勲伐茂煩言爍金內何疚我生不有命途遭武功既究文亦售婉懿同封世相守巖壑廻環洵明秀堅貞不磨銘不謬

大理左評事少渠張公墓誌銘

大理左評事少渠張公以隆慶己巳秋七月二日卒里第其明年冬十二月嗣子嘉穀子壻徐嘉成奉沈孺人之命將卜塋西山之陽乃持五橋徐公所爲狀詣余徵銘余拙且病辭至再終以同榜故不容已廼按狀爲志曰公諱鳴鶴字

九臯先世由汴徙浙隸籍錢塘高祖信當我
明太宗朝以明經起家歷吏部考功郎中曾祖
璘以子貴贈刑部員外郎祖銓由進士歷廣西
布政司左叅議父一源通陰陽五行家言例授
徵仕郎娶陸刺史女生五丈夫子公季子也賦
質穎異不類群兒授之書即成誦屬對句語意
諧徵仕公謂能繼家聲乃收先世遺書悉畀之
未幾失怙家益貧蓋累世雖宦達皆不黷利治
生無以貽其後故至是窘迫無聊昆仲稍稍去

爲商販自給公獨枕籍簡冊間誓死不渝當是
時楊水部南泉亦貧士妻公女弟共治易相與
砥礪游揚齊名里中先後補邑庠弟子員小試
輒高等廩食甲午歲公舉于鄉南泉亦應貢舉
京兆一時爭羨此兩人同志善相成也數上春
官不第至癸丑廼喟然嘆曰丈夫樹立勲名豈
必自科甲出哉吾兩人文不相下而彼信我誦
命也於時謁選銓部授定遠令邑東接廬江連
楚粵北走徐方達京畿當通道盜賊充斥豪右

梗化公宰制有術令行禁止四境乂安值倭寇
犯淮甸將窺濠郡守以邑城堅且有才令悉載
貯積歸邑公密藏之陽取所盛器實他物遣還
示不納狀賊兩相疑懼去郡邑俱賴保全居三
歲餘諸臺多獎薦乃有廷平之擢既去攝邑者
故嘗有釁惡之當路得調外令曹在曹政行不
異定遠郡丞某方恣橫他屬咸順承不給公獨
與之抗故爲裁抑某溪呬之又惡之上官竟罷
歸已而某即攝曹多方媒孽不得漫坐私取贖

金移檄逮問公往自白實無私取事明某亦罷
去卒以是橫被口語甚者謂嘗侵河渠公帑同
宗一二輩不察事理亦呶呶相侵公雖置不辨
終鬱悒不樂抱病數月歿生平高自許丰儀整
飭見人冠不正衣不潔若將免馬持論率出已
見不面從後言以此寡諧喜吟咏晚歲與鄉大
夫結社倡酬研求彌工親族緩急相投輒爲蠲
資殫力不悒知厚以此多之距生正德丁卯閏
正月二十三日春秋六十有三醜即沈孺人子

一卽嘉穀本第鳴鸞次子以倫序相承女二一
贅嘉成卽五橋徐大叅子五橋亦同舉于鄉雅
相厚善一幼未聘於乎委蛇諛悅巧慧獵榮紛
紛欺世之術何可勝道顧直任其性甘犯訛怒
不顧豈所謂經德不回抑質稟所近多剛毅寡
柔克耶卽其宦跡行事亦既快壯心起衰祚矣
余獨悼少渠才有餘而惜其用未盡也銘曰孰
阿儺兮巧媚獨強力而任質務賤人兮貴已祗
峭峻以自適豈拂世兮摩俗甘翁訛其倚恤紛
坎宮兮躡予懸輪轅而不飾嗣猶子兮靡獨振
清聲乎雅什莽林壑兮穹封賁斯文于玄室

國

皇朝文獻通考

卷十五

三十一

